

1 TESALONAIKA

Poloyo Tesalonaika Yeneke Namolo Takoa Wia Wetekane Pipia

1 ¹Polo nopa i mekene uku. Sailasi tota Timosi toa i pipia wia mekakilepa Tesalonaika take Atai Akolali Ali Muno Keraisu Yesutapala lipua meki-kiti kini pipia wia mekako-ye.

Akolaliyo kiwi pewe wia tepe kolotini kilikoa pikoa tomotoane kini kowitikoane uku-ye.

Tesalonaika Yene Yesuke Wene Tuganemo

²Kiwi peyake Akolali-pala ke wa oa kini ibinika i ali i atoa wa oa kini kowitikakala toko. ³Nika tone Atai Akolaline leneke meketepa kini eya tekete tikile wene kibutua meko. Keraisuke wene tugoa mekete onekele wedoa takama yawa ni yete pade ali atoake wene mekhoa mekete mama moa auapea ni tone Ali Muno Yesu Keraisuyo wipitikome toatekole nepia meato wa ke enekakolo meketekete wedianeya nepia-kala mekete tiki.

⁴Anu oya-lawe Akolaliyo kiwike wene mekhoa mekome kipa one kolotini yene wa takoa motaneyano wene tekete oko. ⁵Keraisunomo kiwi mekoika wida oa aua neketepa tone wene kibutua oko agale wamokoona. Epetane Yominine tele patu kautakoa kakete ikilepa totome niminimo-kama oko wa wene tekete oa metekoona. Kiwi pakeke nitoa mekete kiwi auapea tokoonakale kime wene taneya mekete tiki. ⁶Kiwi pakeke toma yakoole enekete kimeka litia tato wa Ali Muno ago tone tokoole kotukoa tokoina. Nitoapa ke-kala enekakale meketekete Keraisunomo yakoa motokoina. Nipa Epetane Yominiyo wedikakale ke wa yakoa motokoina. ⁷Nitikolipa Keraisuno yatene Masedonia Geriki tata ludu pitikoi peyame kini wini Tesalonaika tokoinakale adeka moa tokala tokoi. ⁸Ali Muno agonomo wida mo wia kakoimopa talia koume ta kautameou

toa Masedonia Geriki tata ludu oa pupitikatapeneyea. Kini Akolalike wene tuga mekete tikimoka ta piko peyake oa pupitikatapeneyea. Nitaneyano, kinikimopa totome oateko toa mena. Ta piko peya pitiki yatene ali atoame wete yakatapekete tekete i i wa kiwi Tesalonaika yename tokoi ko okala tekete tiki.⁹ Nipa toto makutukoa motekete tokoi ko ikilepa eya wa ikiya. Tesalonaika yename nimini mea kama poko ago Akolali onekele takama pato wa kini yoname latia kowitikoinakeya-kiti wakete onekele-kama takama yakete tiki.¹⁰ Ni one mana Yesu a tibu mea wakapea nomotoa nepia mekete tiki wa ta piko peya pitiki yatene ali atoame kiwi ko okala tekete tiki. Kini nepikoa meki ago Yesu einagopa tuaneya pikale Akolaliyo moa kamotokaneya. Wa naniko Akolaliyo poanele tokoi ali atoa kibu motokalepa toto toa moo.

Polo Tesalonaika Take Mekome Tanemo

2 ¹Anu oya-lawepa toto kini Tesalonaika take wida ugu note meketepa Akolalinele pata pale takamokoona. Enipa nimini ukutu-pe. ²Nipa Pilipai take potemekolo eni yename toto paya tetepo takoa wakete tete metekoiyake tone Akolaline tele patu kautakoa kakete onekemo Tesalonaika takeka wida toawea opato wa atiki toa onokoona. Padekakitame yakamato wa toto oa ketekakoyake wida note toawea onokoona. ³Opika onekemo yakoa moamene wa totome olaukakilepa pademo koiganemo olaukakoya mena. Nipa atoa lia enile toa enato, i yene oa yotokoa enato wa tolopi toamoko. ⁴Nitamekete eya toko. I yene totome onekemo oiake akamele toko wa Akolaliyo takoa moa kakaka tokolo i i wa toawea oko-ye. Nipa ali atoa wedikadete tekete nitato wa totome tokona mena. Tone tepene piko wene tetoa enoai toko ago Akolali wedikadete ni toko. ⁵Kiwi pakeke mekete taba po pitikoa wamokoona. Enipa nimini ukutu-pe. Akolaline leneke kakene eya wane uku. Kinikiya lede moadete onekemo olaukato wa olaukakoona mena. ⁶Ni yete pade ali atoameka anu oya-lawe kimeka toto kei pimotoa toa enamokoo. ⁷Totopa Kerai suno Aposelo ali-mene tekete kinikiya keda takoa meati wa ameleta tokoyake nimo wamokoona. Kiwi pakeke wida meketepa niname-kiti one mati-kiti mama moa poti pikoa mekome toko toa tokoona. ⁸Kiwi wene mekhoa mekoo matiyame Kerai sunomo oa meato wa oa metekilepa kiwi auapea mea tuadekolopa oyake tuoo wa tokoona. Kiwi wene mekhoa mekoo matiyame nitikoona. ⁹Kiwi pakeke wida mekete eya toa kakoonakale kime wene taneya mekete tiki. Akolalinemo oa meteketepa kini wene keda takaya tokale kue eya manoe wa oia moamokoona. Nitamekete tone moatekooya moadetepa ete pia oto pia tone yoname pupu toa mekoo.

¹⁰Nitoapa Kerai suke wene tuga meane yene kiwi pakeke wida mekete poane wene takoa koikatapeneyea kiyo akenele-kama tokoona. Nitoa

mekete padeya namike ete-kitame toto koiso akatekoile toamokoo. Enipa Akolaliyoka kimeka enekakoa toma yakoonamo uku.¹¹⁻¹² Etename-kiti one mati-kiti mama motokome toko toa totome eyaka tokoona. Kini kini mekoi toa kini wene weye ahoa eya wa mane oa moa toma yakoona. Akolaliyo one talo tuku take pa teleta tootapeneya mea kawatiki peku lawetou wa kiwi kayo oa motokono, one yatene meatiki toa meamene wa totome kiwi mama moa tokoona. Enipa nimini ukutu-pe.

¹³ Ni kime eya tokoinakaleke Akolali-pala ke wa-kama oko-ye. Akolaline agale totome oa metekolo yakatekoapa pa aline agale tetepo takamoia ipa Akolaline agale tadeko wa moa lukakoina. One eni agalepa oneke wene tuga meki-kiti kime yakoa toma pamene wa laweteka pekuwe uku.¹⁴ Yudea take Akolaline ali atoame Keraisu Yesu patu kautakoa kakete toma yakete tiki toa Tesalonaika yene kime kotukoa tekete tiki. Nipa ete Yu yenam o Yu yene tete-kala metekiyake Yesunole pa takama yaki toapa wini takeka ete yenam kiwika tete-kala metekiyake onekele wida pa takama yakete tiki.¹⁵ Dikane Yu yenamepa Akolaline agale toawea akane ali-kiti papete wia tukoa Ali Muno Yesuka wia tukoa tanuya. Totoka poe wa litia wetekakoi. Enipa Akolali timini nateko ea ete yene peya-pala poi teja mea tiki.¹⁶ Nipa Akolaliyo mone pa yatene ali atoa toa motokaya tokolo Yesunomo toawea akateko ka keteka keteka toa kaki. Kini poanele nitoa toma-kala pote wipitikete poanele pinepa mete eya kapetekou toa eni tiki. Nitikili tokome Akolaliyo kiwi kibu mouno nepio wa yopikoa kako.

Poloyo Tesalonaika Yene Mekoika Wa Ugu Poadiya Wa Wene Pianeya Meanemo

¹⁷ Anu oya-lawe kiwi wida memotoa tewitikoa i take pa tekei note mekolopa tone wenepa wida nekeneyake ikapa kepene pa mekoo. Nipa kini lene timini enadiya wa wene pianeya mekete wida noadete wili tokoa kakoo-ye.¹⁸ Wida nou wa wene pianeya mekete ni tokoo. No Polo kiwi meki ta wakapeane noadene wili tokala tokouyake Setanu einagome toto keteka keteka toa kaka.¹⁹ Kini lene timini enadiya wa toto wedia mekilepa edoa tokoto-pe. Tone Ali Muno Yesu wakapea nokalepa Tesalonaika yene kini wini epetekoa tokoinakale i i wa totome Yesu-pala mate agale ou toa toawea okolo yatekome toto kei pioo wa wedia meko.²⁰ Ee nimini, kini wini tokoinakaleke Akolaliyo toto kei pioo tokolo wene yapekolo meko-ye.

3 ¹ Totome kiwi mama motokoo matiyame eya toatekoo oi pedoa pia tokoo. Sailasi tota Atena take kidenalita meoono,² ne pa wa tone oyago Timosi wida moa wetekakoo. Timosi einagome Akolaline takama yakome Keraisuke oa epetekane agale oa aua yako. Einago wini wetekakilepa kini wene weye ahoa Yesuke wedoa wene tuga mema

pomotono, mane mane akapoano pa wa wetekakoo. ³Wini take ete yename kipala poi teia mekoli kiwi odene agoka etepea pokaya tokale ni tokoo. Toto peya ke-kala enekakolo meamedeko wa kime wene tekete tiki. ⁴Papete kiwi pakeke wida meketepa toto peyame tete mokoa kamedeko wa ete yename toto-pala poi tejatekoimo oa pikoonakale wida wete taatekoao tokome toko. Enipa nimini ukutu-pe. ⁵Nikepa kiwi mama motokou matiyame Timosi-pala eya wane okou. Eni yene kipa kiwi likoa eneko ago Setanuyo likoa enekale etepea pokoi patu. Kiwi pakeke Akolalinele takakilepa ipe yolo enadene keneya pata pale tokou patuno, kini Yesuke wene tuga mekete tikile enekapa wane Timosi wini moane wetekakou-ye.

Timosiyo Tesalonaika Yene Ko Okome Polono Wene Weye Akoa Tanemo

⁶Opa Timosi kiwi mekoita wida tewitikoa oto wakapea nokome tone wene epetekakome eya wa oka. Eni yene kiwi Yesuke wedoa wene tuga mea kini kini wene mekanali yoa ni toto wene taneya mea ke wa wedia mekete tiki wa oka. Eya waka oka. Totome kini lene timini enadiya wa wene taneya meko toa kimeka tone lene timini enadiya wa wene taneya mekete tiki wa Timosiyo oka. ⁷Kini Keraisuke wene tuga mekete tikimo totome eni yateketepa ke-kala enekakolo mea tete mokoa kawa teketeke ke wa kini wini mekete tikileke wene yapekolo meko. ⁸Kipa Ali Muno patu kautakoa poapeneya kakete tiki wa tone wene latai akeneya meko. ⁹Widikoa mekoi ko yakatekoao tone Akolaline leneke wedoa wedia kakono, one-pala ke wa-kama oko-ye. ¹⁰Nitoa ete pia oto pia Akolali kowitoa meketepa kini lene timini wa enoo wa oa ni onekemo pademo wene toamikimoka ni onekele padele katekoao takamikileka i i wa kiwi oyamekutu toma poo wa totome kowitikala toko-ye.

¹¹Opa eyagota toneketai Akolali-pala tone Ali Muno Yesu Keraisuta Tesalonaika take pote meateko ka kitame yamea toe wa totome yakoa kowitiko. ¹²Ni kiwike wene wedoa meko meko toko toapa kini kini wedoa wene mekanali yoa yete pade ali atoakeka wene meko mema pomotono ta wane Ali Muno ago kowitikaku-ye. ¹³Ni kini wene weye akoano ta wane kini kowitikakilepa eya tomotono nitamene wane kowitikaku. Neke wene kiyo akaneya meki yene-pala opia wakapea nokapeteka anu Tesalonaika yene Atai Akolaline leneke atiki toa kamotonon ta. Papete padele poanele toameneyea epetekoa-kama tomotono ta wane kini kowitikaku-ye.

Akolaline Wene Epetekakete Toatekole

4 ¹Anu oya-lawe kipala eya wa wipitikete oko-ye. Akolaline wene epetekakete toatekoile totome i i wa kiwi mane mane okoona. Eina mane mane okoona toa kime litia tekete tiki. Opi Ali Muno Yesuno

ibini wedekaketepa eya tamene wa kiwi kowitoa oko-ye. Widikoa meki toa wedoa toomoa pamene. ²Ile tamene ile tamene wa Ali Muno Yesuno agale patu kautakoa kakete okoonakale kime wene tekete tiki. ³Akolaliyopa kiwi wene kiyo akeneya mea epetekoa toma pomotono wene pia mekono, mone koua piamatiki atoa-kiti-pala koua piameamene. ⁴Nitameneya kini atoa-pala koua mekilepa Akolaline lenekeka ete ali atoane lenekeka wene kiyo akeneya mea tamene. ⁵Nipa Akolali wene toameneya meki ali-kitame atoa-kiti poi motekete toa potokakete tiki toa toameamene. ⁶Neke oyago yotokoa one natono-pala koua pikile padé toameamene. Enile poanele tiki ali-kitipa Akolaliyo kibu moo. Kipala papete pubu okoona toa nitoono, toameamene. Ni edoa-mo. ⁷Akolaliyo totopa one wa kayo oa takoa motikilepa eni poanele tomotoa tokoya mena. Onekele epetanele-kama takamotoa ni toka. ⁸Panagome-kiti kipala i ukule wawa toamokomepa nipa aline agalepa kote tokolo wakoya mena. Akolaline agalepa kote tokolo wakoya. Nipa one Epetane Yomini kiwike awia mepoano pa wa moa wetekakago Akolaline agale eni wakoya.

⁹Keraisuno ali atoake wene mekoaa mekete toatikile i i wane wiane mekatekule toamoko. Kini kini wene mekanali yoma poatekoile Akolaliyo wete olaukatapeneyano, enileke pademoka wiane mekamuku-ye. ¹⁰Ee nimini, wini Masedonia take Yesunomo yakoa motokoi yene peyake wene mekoaa mekete tiki. Widikoa moa patukoa kini oya-laweke wedoa wene mekoaa meemoa pamene wa totome kiwi kowitoa oko-ye. ¹¹Utanele-kama toane poti yawou wa wene pianeya yamene. Ni panagome onekele toa mekale eneketepa dikoa ta dikoa ta wa teiga teiga toameamene. Ni totome mane mane okoona toapa nee eya moadete kini yoname pupu toa mokala tamene. ¹²Yete padé ali atoame kiwi kei pimotono nitamene. Edikoa meketepa nipa ete ali-kitaneyea oia moatiki toa mena.

Ali Muno Wakapea Noatekamo

¹³Anu oya-lawe kipala i ukule agopa taneya meamedikili eya wane uku-ye. Yesuke wene tugoa mea tua pekene ali atoake wene keda taneya meameamene. Nipa tuane ali atoa wa kamoaa poamoi wa wene pianeya meki-kiti tumai mekete tiki toa toameamene. Ni edoa-mo. ¹⁴Yesu tuake wa kamoaa pekenemo einapa nimini akenemo wa totome wene toko. Tuake kamoaa pekeneyano, Yesu-pala lipua mea tukoi peyapa Akolaliyo mana-pala odeneka wakapea nekete noati wa koua noo waka totome wene toko.

¹⁵Ali Muno agome olaukanemopa totome i okono yakamene. One wakapea noka-pete toto pa meadekolopa nipa oneke wene tugoa mea tukoi yene naniko nomotoa toto namolo takoa Yesu kotua pikilepa toamoo. ¹⁶Nitamekete eya too. Titikilepa Akolaline bera ta pa piitakutukoa kakaka one ako edelo agome kayo telo ootapeeo. Nitikale Ali Muno agome kotua

noe wa kayo oa ketipea noademē nokale Keraisuke wene tugoā mea tukoi ali atoa ate kamoā poi.¹⁷ Nititikaneyake toto tuameneya pa meko-kitipa one a tibuke kotua pikilepa eni yene-pala wedo pakeke moa obokaneyea pekete poo. Nipa enipete titimoa Ali Muno ago-pala pa mea kama kawoo.¹⁸ Kipala i ukumomepa kini kini wene weye akanali yoma pamene-ye.

Ali Muno Wakapea Nomotoa Nepia Meamene

5 ¹Anu oya-lawe ina ukulepa dikoa taatekoā too, ipete taatekoā too wa totome kiwike pipia wia wetekateko toa mena. ²Ali Muno ago wakapea nikilepa kode ago keneya yomiyomu keneke kotikataapea noko toa noono kime wene tekete tiki. ³Ali atoamepa ipetepa kipala padele toameneya kilikoa meateko-peteno, atiki toa meato wa paya nou toa mekoli eya too. Mati kakene atoa kotikataapea mati mukiti nou toa kiwi mekoita poime keneya tulikatapeoo. Nitikale petoa poatekoika agopa taneya meoi. ⁴Ete yene nitoa meatikiyake anu oya-lawe kipa yomiyomu keneke meamiki. Ali Muno ago wakapea nikilepa anu oya-lawe kiwi lene kilikoa piameneya mekoika noo. ⁵Kiwi peyapa lou pā keneke yaki ali atoa. Anu oya-lawe totopa yomiyomu keneke yawamoko. ⁶Ete ali atoa atu pia meou toa atiki toa meokino, edikoa meamato. Atu piameneya mea wedetekoā yatoane uku. ⁷Ali atoa atu pitikilepa likonu tiki. Bia ue eya nokoa kawa leau akeneya yakilepa likonu tiki. ⁸Toto pade nitamekete lou kako-pete yawa mekono, wedetekoā yakete eya tato. Poyo ago-kiți pinali one wa kaumotokome palanuke kapa petene moa awitikou toa tekete Akolalike wene tugoā mea yete pade ali atoake wene mekoā mea tato. Ni poyo ago poike poademe kakome kapa nunagu moa wateou toa teketepe Akolaliyo toto toa moono, ke wa nepia meato. Ni edoa-mo. ⁹Akolaliyo toto kibu moateka wene toopiamokome eya tou wa wene toopianeya. Tone Ali Muno Yesu Keraisuyo toatekaleke kiwi toane mou wa wene toopianeya. ¹⁰Keraisu taatekoā nokome totoke tukilepa eya tomotoa tokome taneya. One wakapea noka-pete toto wete tua pekedekoloka pa meadekoloka one-pala lipua meemoa pomotoa tokome taneya. ¹¹Nitaneyano, Akolaline yapu wikakou toa kini kini mama moa auapenali yoma piki toa pa edikama pamene.

Poloyo Wipitikome Akenemo

¹²Anu oya-lawe kiwi pakeke Akolalinele wedoa takama yaki-kitipa paya tetepo takameamene. Ali Muno agome i yene kiwi talo toa mane oa moa tamene wa moa kakane yeneke uku. ¹³Wini yenamē tikileke ke wa kiwi wedoa kei pia wene mekoā mea tamene. Kini kini odene wene piitakutukoa meamene. Tepe kolotini-pala kilikoa pimotoa meamene.

¹⁴Anu oya-lawe eya tamene wa kiwi kowitoa oko-ye. Kalabo wameneya yawa meki yene pupu wedoa tamene wa mane oa ni piti

motaneyea meki yene wene yapetekoa ni Akolalinele wedoa takama yawamiki yene auapea tamene. Ete yene peya mama moa uutukoa poti yopiamene. ¹⁵Ete-kitame kipala poanele tokolipa nipa poaneleme ete topo takameamene wa mane mane amene. Yesuke wene tuga meki yene-palaka ete ali atoa-palaka epetanele-kama toa enekala tamene. ¹⁶Ete pia oto pia wedia meamene. ¹⁷Ta pataka abuna Akolali kowitikala toa ¹⁸ele kuleme ke enekakale meketeka Akolali-pala ke wa oa tamene. Edikaketepa Akolaline wene motekete toi. Nipa Keraisu Yesu patu kautakoa kakete nitimotou wa Akolaliyo wene pikale eni tekete toi. ¹⁹Ni toe tuga mou toa tekete Epetane Yominiyo ta wa okale tagoa toamokayano, one okale wedoa yakoa tamene. ²⁰Akolaliyo one agale toawea akaki ali-kiti imo akamene wa wene takakomopa pamo tetepo takoa wawameamene. ²¹Pademo pademo yateketepa nimini iki patu wa wene kibututukoa meapa kapenemo takoa wawa niminimo yakoa moa tamene. ²²Ele kule poanele tikile peya titi toma yamene.

²³Tone tepe kolotini kilikoa pikako ago Akolali-pala totome eya wa kini kowitikoa oko-ye. Neke wa takoa motokana yenane nekele kiyo akenele takatiki kotu kakoa tomotono ta. Tone Ali Muno Yesu Keraisu wakapea nokaleka kini yomini kini tepene piko wene kini tigini moa koigameneya meketepa ete-kitame padefa namike akoa agale oatikile toamomotono ta wa totome kini kowitikako-ye. ²⁴Kipa one wa kayo oa motoko agome tou wa oka toa-kama taatekoaa tokala tokono, tone ina kowitikakomo yakoa too. ²⁵Anu oya-lawe toneka kowitikamene-ye.

²⁶Tone wini take meki oya-mikiti-pala ke wa kini yono motokamotoane uku-ye. ²⁷Ali Muno agono ibini wedekoane eya tamene waneka uku-ye. I wiane wetekaku pipia wida nokale Keraisuno ali atoa peyame yakamoton, oi motokamene. ²⁸Tone Ali Muno Yesu Keraisuyo kiwi peya pewe via yopimotoane kini kowitikoane uku-ye.

Opa anu agale eni.